

23.5 RAPPORT DEPUTATE RADIO- EN TV-UITSENDINGS (Artt 117, 145)

- A. Ds HJP de Beer lewer die Rapport.
- B. **Besluit:** Die Rapport word verwys na Kommissie Publikasies en Media.
- C. Ds JP Fleischmann rapporteer namens die Kommissie Publikasies en Media.

D. RAPPORT

1. Opdrag

Om in samewerking met Radio Pretoria, asook SABC en CNW en ander gelisensieerde uitsaaiers met wie amptelike samewerkingsooreenkomste bestaan, die uitsending van Gereformeerde eredienste, kerknuus en deelname aan godsdiensooreenkomste oor Radio en TV te reël. (Acta 2003: 690)

Besluit: Kennis geneem.

2. Sake waarvan die Sinode kan kennis neem

2.1 *Uitvoering van opdrag*

Die uitsaai van eredienste, kerknuus en deelname aan godsdiensooreenkomste het in die tydperk sedert die vorige Sinode gereeld op die senders van Radio Pretoria, RADIOKANSEL (CNW) en RSG (SAUK) plaasgevind. Die uitsendings op RSG word nie meer deur RADIOKANSEL behartig nie maar deur 'n onafhanklike mediahuis genaamd Tripel M Produksies met dr Flip Loots aan die stuur.

2.2 *Uitsaaigeleenthede*

2.2.1 RSG

Met die navraag oor die jaarlikse toekenning van preekbeurte en godsdiensoefeninge aan die GKSA op RSG, het Tripel M Produksies as gemagtigde om godsdiensooreenkomste op RSG te behartig, die volgende inligting verskaf:

- 2.2.1.1 Daar is nie meer 'n formele persentasie van toekenning van preekbeurte aan verskillende kerkgenootskappe nie.
- 2.2.1.2 Daar word nou eerder gekyk na persone wat redelik radio-matig is en 'n goeie, aktuele boodskap uit die Woord vir die luisteraars kan bied.
- 2.2.1.3 Die verskillende kultuurgroepe in die land moet ook in die godsdiensooreenkomste op RSG geakkommodeer word.
- 2.2.1.4 Vroue-leraars moet ook optree.
- 2.2.1.5 Daar word nie net meer van "geordende leraars" gebruik gemaak in die weeklikse kort reekse en die ateljeedienste nie.
- 2.2.1.6 Die grootte van alle die kerke word ook in ag geneem.

Eers nadat al bogenoemde kriteria in ag geneem is, word gekyk na die verdeling van geleenthede tussen die kerke. Die GKSA kry volgens Tripel M Produksies wel 'n billike toekenning van die beskikbare beurte.

Beroepenuus word nie meer op Sondae oor RSG in die program *Kollig op die Kerk* uitgesaai nie. Die nodige amptelike navraag en behoefteverduideliking vanaf die GKSA in die verband is deur die Deputate gedoen, maar daar is deur RSG volstaan met die oorspronklike besluit om nie beroepenuus uit te saai nie vanweë die beperkte nuuswaardigheid daarvan.

2.2.2 Radio Pretoria

Huidig word deur die godsdiensooreenkomste van Radio Pretoria aan die GKSA op gelyke basis met die NGK, NHK en APK geleenthede toegeken vir godsdiensooreenkomste op die spesifieke stasie. Dit beteken dat ongeveer 12 of selfs 13 weke per jaar deur Radio Pretoria aan die GKSA toegeken word. 'n Week se uitsending behels 'n oggendediens op die Sondag en daaglikse dagopenings, dagsluitings, huisgodsdienste en oggendoordenkings op die weekdae.

Aanderedienste is ateljeedienste wat maandeliks om die beurt aan die verskillende kerke toegeken word. Dit beteken dat die GKSA 4 of 5 Sondae agtereenvolgend die geleentheid ontvang (elke 4de maand) om die aanderedienste waar te neem.

Die normale toekenning van uitsaaigeleenthede kan ongelukkig vanweë die reiskoste aan die opnames verbonde, slegs binne 'n radius van 150 km vanaf Radio Pretoria geskied. Kerke buite die radius wat graag 'n uitsaaigeleentheid wil bekom en so 'n versoek aan die Deputate rig, moet bereid wees, sou Radio Pretoria daartoe instem, om die reiskoste wat die 150 km radius oorskry, self teen 'n vasgestelde tarief aan Radio Pretoria te vergoed.

Kerknuus word soos dit vanaf die Administratiewe Buro ontvang is Sondagoggende op die sender uitgesaai.

Di HJP de Beer en P Van Wyk het as verteenwoordigers van die GKSA t.o.v. Radio en TV uitsendings, die onderskeie vergaderings sedert begin 2006 van Radio Pretoria se godsdienksomitee bygewoon en daar die nodige insette gelewer.

2.2.3 SABC TV

Ten opsigte van TV het die Deputate geen versoek ontvang om vanuit die Gereformeerde Kerke 'n uitsaaigeleentheid waar te neem nie.

2.3 *Radiokansel*

Ds HJP de Beer het aan die Uitsaai-owerheid 'n brief gerig ter ondersteuning van die toekenning van 'n lisensie wat die uitsaaigebied van RADIOKANSEL aansienlik sal vergroot.

Besluit: Kennis geneem van 2.1 tot 2.3.

3. **Sake waarvoor die Sinode moet besluit**

Dat weer Deputate aangewys word met die opdrag:

- 3.1 Om weer Deputate aangewys word met die opdrag om in samewerking met Radio Pretoria, asook SAUK (Tripel M Produksies) en RADIOKANSEL en ander gelisensieerde uitsaaiers met wie amptelike samewerkingsooreenkomste bestaan, die uitsending van eredienste, kerknuus en deelname aan godsdienstprogramme vanuit die GKSA oor Radio en TV te reël. Om by ds E Kayayan te verneem of die Deputate die Franse Radiobediening van hulp kan wees.
- 3.2 Ds HJP de Beer word weer as verteenwoordiger van die GKSA op 'n subkomitee van die Raad van RADIOKANSEL, genaamd die Teologiese Advieskomitee (TAK), as deel van 'n paneel bestaande uit 12 denominasies en organisasies, aangewys.
- 3.3 Die name van medewerkers uit Gereformeerde kerkverband t.o.v. uitsaaigeleenthede deur die Deputate aan die betrokke instansies deurgegee en gekoördineer word.
- 3.4 Dat persone uit die kerkverband wat graag mee wil werk t.o.v. uitsaaigeleenthede hulle name aan die Deputate sal deurgee, wat dan in dien moontlik die nodige reëlins met die betrokke instansies sal tref.

Besluit: Goedgekeur soos gewysig.

- 3.5 Die Sinode versoek Klassisse om met plaaslike radiostasies te skakel ten einde geleentheid vir Woordverkondiging (eredienste en oordenkings) te organiseer.
- 3.6 Die besonderhede van sodanige skakeling moet aan die Deputate Radio- en TV-uitsendings gekommunikeer word vir koördinasie.

Besluit: Goedgekeur.